

TCHAINSONS DI DJOUÉ
QUE PÉSSE

AMBRÛESSE

Enne feuye s'envoule, enne paidge ât virie.
Les sentous de l'herbâ dichtillant tchétçhe grie...
I me léche envayi pai lai caje et le temps
Que coule, trébille, rujôle di préjaint.

Les aibres s'dénutant, mains s'mondant tos yots fruts,
Que les loitchous afaints v'niant chmarotsaie sains brut.
Pô è pô les oûejés s'raippreutchant des mâjons,
Tot s'en vait et tot r'vint : l' sondge tint sai sâjon.

Dâdon i veus vâdgeaie vos imaidges aimies,
Seuv'nis, tchairmous échpois, sensâchions ébrussies,
Que bouléj'nèz mon tiûere encoué rétrémolaint ;
Et peus i vôs envie en l'hésâid de vos tchaints.



PAIYISAIDGE

Â meûdi di câre d'Béfoûe,
S' trove lai tchairmouse voidjou
D'in paiyisaidge pyain et môve :
Ç'ât lai « Sologne » de tchie nôs.

Ciro s'endreme tot yot sô,
Ryuainne â s'roiye, â long des bôs,
L' âve muatte des étaings,
Michtérieus et chéduaints.

Po lai brecie dains l'aipaîj'ment,
Les oûejés sains fin tchaintelant
En mâçhaint yot' djâsè douçat
È lai bije et les époulats.

È y é poi-chi d'grôs paiyisains,
Des vaitch'ries â moitan des tchaimps,
Qu' les grants aibres v'lant éffaicie
Dains yot'aiv'neutche, en lai meûcie.

Pairmé des tchaimpois bin ençhos
Péturant les paisibyes prôs,
Que mirgodlant de taitches fâves
Lou finaidge et ses trichtes âves.

Voichi dains in détoué di tch'mîn,
Â fond di vâ, pairvés lou m'lin,
Ïn p'tét v'laidge qu'eûffre en nos r'dyaîds
Ses roudges toéts et ses tchemnèes.

An é cré bin rébiè son nom :
Ât-ce Tchetchl'evant ? Choérimont ?
En trébillaint in ru le londge,
C'ment lou seuv'ni d'in véye sondge...

R'TOÉNAIE È ÇHOÉRIMONT



I aî lai grie de r'veni lai-vâs dains mon v'laidge,
I aî lai grie d' migaie sai fiere et baintche toué.
I aî lai grie d'ôyi lou tchaint de ses dous rus,
Â long d'l'hôtâ, laivoû mon aîme ât demoérée.

I aî l'envie de r'trovaie les sentous d' l'herbâ,
Lou brussâlou finaidge, lai pitçhatte di djoué,
Tiaind qu'i moinnôs, tot endremi, ès tchaimps les vaitches.
I aî l' envie d' senti lai çhait'rie di bon temps,
Tiaind qu'lou voirddie s'rempiât di traiyin des oûejés.

I vorôs r'voûere les caim'rades, les aimis,
Les siéjainnes baîchattes, les boûebats aidgis,
Que ritant dains les bôs po tieudre les neuûsiyes.
I vorôs baidgelaie daivô nos véyes dgens,
Qu' diant : « i m'en révijs.. », sietès dôs l'hôtçhuâ.

Li me raittire lai mée grulainte des biès,
Les tchéyons de voyin rébiès dains lai roûe-neût.
Li me raittire le brond'naijde des aichattes,
Les piaînjèts, les çhiot'ments d'lai bije de Djanvie.

I adraî en sondgeaint vés les toéts d'Çhoérimont,
I bous's'raî tot bal'ment lou véye heûs di môtie,
I poraî aidmirie encoué lai Note-Daime,
R'montaie â ceim'tiere eurdjoindre mes chérs aimis.

L'HÔTÂ REVIQU'NÈ

Â long d'in grant saip'lat, nitchie dains son voirddie,
Dreme in hôtâ rempiâchu de poijaints seuv'nis.
Ses biaincs murats s'coitchant dôs in toét bin aissadge :
Cape que tieuvre des michtères pieins de cadje...
Mon grant-père encoué djûene li-d'chu é oeûvrè :
C'était in âtre siecle et tot l'v'laidge é pris paît
Po éy'vaie les tirains, péssaie ces roudges tieles,
Dains in djoyou émeû d'coyats foûes et aidgiles.
Aiprés lou Djean, lou Djules et l'Tchailat aint cheûyu.
Tot était piein d'afaints, d'écaquelèes, de djûes,
Brâment d'bêtes, de dgens, tot lou train d'paiyisain,
Rigotint dains lou câre aivô in dyé traiyin.
I m' révijs chutôt d'lai grôsse béche-coué,
Sai ribambainne d'oueyes, de pous, de boérés,
Di colombie, de ses vis et loidgies siv'ments,
Des bessons, di noi tchîn qu'djaippait è tot môment...
Et lou temps é péssè, tot çoli é véyi,
Pô è pô, tot bal'ment, ces yûes se sont cajies.
Lou pyain é rempiaicie lai vétçhaince évadnèe :
Dempie résounint les tchaints des p'téts l'ouêjés.
Onnaie aiprés onnaie, c'ment dôs enne lessue,
L'hôtâ ât d'v'ni muat, lai r'toénèe s'ât enfûe.
Aidûe rujes, breuyèts, aidûe les aibaiyeuts !
Tot é tçhissie sains brut vés lou veûde et lai neût...
È n'y aivait pus qu'enne fanne, aiccabyèe pai l'aidge,
Que d'moérait li, lai driere, et lou drie témoingnaidje
De ces héy'rous môments, di bonhèye, d'lai djoûe,
Predjue dains ses seuv'nis, elle aittendait lai moûe...
Lou cieutchie en lai fin é soinnè son trépés ;
Dâli lai vèy' mâjon, virie vés lou péssè,
S'ât encoé aibeutchie dains lou s'roiye meûçaint :
I musôs è tchété d'lai belle â bôs dremaint...

Poétchaint c'n'ât p' in siecle, mains des onnaies aiprés,
In bé djoué di tchâtemps, en lai fin d'lai mait'nèe,
I crais ôyi in brut, rébiè dâs bin grant temps ;
D'enne rotte de dgens que tchaintant, que youquant !
Ce n'sont pouè des r'viniants que moinnant lou saibbait :
I vois dôs l'hôtçhuâ in boquat de tieulèes,
Des boûebes, des baichattes et des afaints poitchot,
Lou brasie d'in méchoui, d' boénnes botaiyes aito,
Enne fête que djoffe et regosse d'voidjou !
Et que m'vint réviçaiè qu'è y é tôdje in aitch'tou
Po r'bèyie lai djûenence et in tchairme moiyou
Ès hôts endremis dains nos sondges grietous.



MÉCHI, MAIRIE-THÉRÈSE !

An m'é contè qu'Ulysse, hanne taint coéraidgeou,
De r'trovaie son hôta â aivu tot hèy'rou.
Èl â rev'ni de loueu, aiprés in grant viaidge,
Vivre aivô ses aimis lou réchte de son aidge.

Vôs êtes tôdj' d'moérée â long de nos cieutchies,
De l'âtre sen di monde vôs n'èz djanmais sondgie,
D'nos finaidges Comtois vôs n'airèz pouè lai grie :
Ç'ât dinnai qu'aint péssè les onnaies de vot'vie.

Mains ç'ât cré bin adj'd'heû l'esempye lou moiyou,
Chu c'te tiere ousqu'les hannes se diant malhèy'rous
Tiaind qu'ès daivant bin s'vent ritaie, tot engraingnies,
Po ramonc'laie des sôs et encoué traivaiyie.

Et vôs èz tranvoichè lou siecle tot bal'ment,
Sains rébiaie de voingnie lou bin è tos les dgens.
Vôs èz oeuvrè, seûffri et cognu des piaîjis,
Vôs èz itou praiyie lou Bon Dûe d'nos môties.

Po tot ci grant tchemin i tire mon tchaipé,
Po ci patois d'tchie nôs qu'vôs èz saivu vadgeaie,
Po vote pâtience et vot'douçat sôri,
Daivô tos ces qu'sont ci, i vôs dirai : méchi !!



BALLADE DE LAI SEUVÉNIANCE

Dje lou temps é baintchi mes pois,
Mai djûenence s'ât évadnèe ;
De mon aîdge i toutche lou soi,
Mains lou seuv'ni m'ât tôdj' réchtè.
I sondge en vôs, çhaires onnaies,
De l'afaint biond et binhèy'rou,
Daivô son r'dyaîd émiratçhè,
De vôs, sains fin, i seus grietou !

Toi l'Henri, i te sens se preutche,
Cape tirie chu l'nai en d'vaint :
Te m'sôris d'dôs, sains qu'i poyeuche
D'visaie poquoi ci bon aigrun.
Ç'ât vôs, lou Djules et peus l'Djôset,
Sietès chu l'boudge, bés djâsous,
Dains not'patois vôs tyïnsenèz :
De vôs, sains fin, i seus grietou !

Lai Mairie, de ses mains raigattes
M'eûffre enne britye d'tiaivoinure,
Di temps qu'lai Mélie, sai mugnatte,
Aiprâte des reûties de burre.
Et toi, Rélie, que veus m'dyaitaie,
Que m'dis « Mon minon, mon trézoûe ! »,
Toi, Germaine, qu' saîs m'endjôlaie,
De vôs, sains fin, i seus grietou !

Boènnes dgens soûetchies di péssè,
Po moi djanmais vôs ne s'rèz moûes,
Â fond d'mon tiûere i mermeuj'raî :
« De vôs, sains fin, i seus grietou ! »



DÛEMOINNE

Lou çhaile visaidge de l'afaint endremi
È ses sondges douçats eûffre in tchairmou sôri.
Ses eûyes sannant çhôs, mains ès aint devisè
Drie les lâdes, lou s'roiye et sai tiève biâtè.

Les rés dourès çhaitant lou véye hôta biaintchi,
Di temps que lou poulot évoiye son dgen'ri.
D'feûs s'émeût lai daubatte dyîndye des oûejés,
Que tchaintant yot 'piaîji è ci mait'in nové.

Les vaitches dains l'étâle barrant les rét'lis,
Lou grant-pére en sobots s'en vait vés ses mikis,
Les dgerainnes graijelant c'ment des évad'nèes,
Dôs les paittes des tchouvâs soinne lou paivè.

Les bruts de lai tieûjainne, les raims qu' sont brijies,
Lai sentou di fouénat, di caf'ta , des reûties,
Breçant lou bé l'aifnat que s'embrûe dains ci djoué
Daivô son ainnonceince, et peus sai fiaince encoué.

Lou véjin en çhiôtaint airraindge son femie.
Chu lai piaice lai Dyite et, bin chur, lai Mélie
Baidgelant en patois, sains râte, è r'bousse meûtè,
Et l'afaint les r'cognât dains yote dyé djasè.

Bîntôt èl oûeye les seillots di laicélie,
Lou premie côp djoyou que tchaimpe lou cieutchie...
Pouéchque nôs sons dûemoinne, et, tot émiratçhè,
Lou sôri di boûebat dinnai l'é sailuè,

C'ment lai pierle de pus â coulèt de sai vie,
Lai prouve de l'aimouè di Pére po son fé.

DJOUÉ D'FÊTE

I crais qu'è fât fétaie l'aîdge d'Valérie :
D'vaint ses nonante onnaies i seus bîn écâmi,
Mains nôs sons hèy'rous d'être ensoinne daivô lie !
Dâdon i épreûv'raî d'y dire not'méchi !

Po chûr qu'adj'd'heû' n'ât pouè ïn djoué poroil ès âtres,
Ïn nûef de décimbre t'és tchoisi de pairâtre
Dains l' traiyïn di monde que t'é r'ci tote aif'natte
Et qu'é vit'ment saivu qu'te n'étôs pouè muatte !



È y en é que ritant dains brâment de paiyis,
È y en é que péssant bîn di temps chu les vies,
Mains toi t'és demoérée â long de lai frontiere :
De Boncouè, de Dêlle t'n'és pouè voyu paitchi.

Mit'naint encoué tai boénne landye ainme è eûffri
Des riôles, des raicontes, des hichtouères âchi,
Dains ton patois piaîjaint et tot pien de saivou,
Que nôs tchairme brâment d'lai musitye d'ses mouts.

Nôs ains t'aivu lai tchaince de t'aivoi ès lôvrées,
De péssaie daivô toi d'grantes, boénnes boussées,
D'ouëyi tes bés seuv'nis et peus tes écâquelées,
Tes direns de saidgence qu'sont l'mie de ton s'né.

Et daivô coéraidge t'és tranvoiché les ans ;
T'en és vu d'bîn des sôtches, te cognâs les dgens !
Tot di long t'és vâdgè bon aigrun et sôri.
Braivo po tes nonante, ès nôs f'sant grôs piaîji !!

SONDGERIE PO LOU BON TEMPS

Paitchi-feûs véti de lumiere,
Dâli te ne r'vînrés djanmais ?
Laivoûs' qu'ât lai sentou de Mai ?
Predjue d'l'âtre sen de lai tiere ?

Se dempie te v'niôs nôs sôrire,
Réchûere lai boérbe, les goyèts !
Paitchi-feûs véti de lumiere,
Dâli te ne r'vînrés djanmais ?

Cré bîn de l'âtre sen d'lai tiere
Te t'és dâs bîn grant évadnè,
Tchairmaint endjôlou que raittire
L'aimie que sondge en tai çhairtè,
Paitchi-feûs véti de lumiere !...

TCHÂTEMPS

Dains lou premie sôri di djoué, en lai pitçhatte,
I euvre les eûyes dains lai frâtchou douçatte,
Te m'révoiyes, mugnatte !

Lou s'roiye vait son tch'mîn, veut embraisie lou cie,
Ses rais d'oûe tot bal'ment v'niant se faire aidmirie,
T'és mes bijats, mai mie !

Dôs les feuyaidges, dains lai touffe de meûdi,
Tiaind qu'les oûejés s'câjant et sannant endremis,
I ne t'aî pe tçhittie !

Mains dje l'aîchtre çhailit, è c'mence è aivâlaie.
Lou finaidge et les bôs poyant se raicouaie,
Nos coûes d'moérant sèrrès !

Lai neût voingne mille yeutchîns chu son mainté noi,
Mitnaint lou pyain et l'aipaîj'ment aint lou povi...
Mon aimouè, mon échpoi,
I aî tôte fâte de toi !

PIEUDGE DÔBATTE.

Lai pieudge violatte
Bèye l'virolat
È l' aîme muatte,
Â tiûere couâd.

Lai pieudge biévatte
Riffe les tchainâs,
Taque en lai poûetchatte,
Et s'enfut lai-vâs.

Lai pieudge noiratte
Bote ses bairrâts
Â d'vaint d'mai f'nétratte,
C'ment de dus souêtas.

Lai pieudge grijatte,
Tend ses flés d'airtchâ
Chu les maijenattes
Embôlèes aivâs.

Piaîjainne pieudgeatte,
Çhaile et vi paip'rat,
D'mai târe mugnatte
Vins çhaiti lou mâ !

Mains pieudge dôbatte,
Dains tai dgenâtch'rie,
Te r'tîns préjeniere
C'tée que m'ât tchératte !

Et paimé les fuattes,
Les trichtes fouldas,
Lai pieudge sains râte
Traice ses rebrâs.



MUSATTES PO LES OÛEJÉS

Dains lai peute sâjon, di dieut temps de l'huvie,
Lou maitin, en lai pitçhatte, vôs étins li,
Dains les brainçattes di c'léjie, po saluaie
Lai çhaile lumiere, ainoncie in nové djoué.

Lou paitchi-feûs, tot reuchelaint de vis tieuléés,
Vôs égainguéye chu vos tchérattes covèes.
Lou tieûsain que vôs preusse, aittieud vos vis péssaidges,
Mains sains râte vos tchaints tchaimpant yots doux méssaidge



Et peus lou tchâtemps eûffre ses grantes djoénèes,
Enson lou bieu vôtî i vôs vois virâyie
De vos envouls aidgis vôs dévouêrèz lou cie
Sains fin, di temps qu' maivure lai biondou des biès.

Les brussâles d'Octôbre vôs dyid'raint ciro,
Bôlattes de pieumes, épaivuries bîntôt
Pai lou dgeal, lai neût, lai faim, lai pieudge, lai cadge :
Chu lai rive d'lai f'nétre vôs pôs'rèz lai vâdge.

C'ment l'oûere chu lai pée, les sâjons s'en allant ;
Poétchaint les oûejés tôdje â long d'l'hôtâ r'vignant.
Péss'rèts, mieles, meûsattes, fieres hèlombrattes
Edjoûeyant nos redyaîds et béyant des musattes.

L'oûejé chu lai tchem'née ât saingne d'aimitie,
Lu, que n'raimésse ran, ç'ât lai fiaince aipaîjie,
L'oûejé tôdje en émeû aippoétche lai dyète
Et l'oûejé dains lai nue ât sondge d'yibretè.

SONDG'RIE D'HUVIE

Dains lou raivéch'ment di sondge d'afaint,
Lai nadge en trébiats vire et tchoit sains fin,
Et traice ses tchairmouses rayes
Daivô mille et yenne tocâyes :
Elle r'sanne in fôlat yutin.

Dôs lou pyain de lai neût, c'ment enne aimie,
Douçatte et dichcrètte, elle s'ât tçhissie
Envirvojnaint les piaingnous tchênes,
Et lou grant veûde de lai piaîne,
Po çhaiti lai mâjon entmie.

Pairmé les gasses, les couès, les hôtçhuâs,
Lai nadge moène son saibbait muat.
Elle évoingne c'ment d'lai poussratte
Sai biaintchou que rite et s'airrâte :
Envoulèe de grietous paip'rats.

L'afaint encoué sôrit drie ses pâpieres ;
Ses sondges s'en allant, c'ment des praiyieres,
Vés les bièves foltas que v'niant
Di fond di cie, michtérieûj'ment,
Aippoétchaie l'aipaîje chu tiere.

LOU PRÉJ'NIE

Voichaint ses laîgres sains répèt,
Lai pieudge é tirie son ridé ;
Sains râte elle râte lou cie,
Dgeiviôle que me tînt préj'nie.

En-delai ses eûyes gri'tous,
I sondge en l'eûche de l'âlou
Que réye et conduit mai vétçhaince
Pairvé les brais de l'indiff'reince.

Lai maîtch'crôte aibôlit l'échpoi,
Elle ondoiye ses trichtes pois
En d'chu lou laindyérou finaidge,
Que s'embôle âtouè di velaidge.

I ôs les çhoés que sanyotant
Yos sentous évadnèes dâs grant.
I m'empîât d'lai grije lumiere,
Que sanne r'toénaie è lai tiere.

Piepe yun appeul, niun ne m'aïttend
Paimé les nues di métchaint temps ;
L'ôûere piaye les saipîns maves,
Mon âme ât préj'niere des âves.

I n'sais pus ton douçat sôri,
Dains lai brussâle i l'â tieuri,
Dains lai campagne décombrèe,
Tot di long d'lai noire vâprèe.

En écâtchaint ses voèles peuts,
Lai biève tçhisse vés lai neût.
C'ment lou du battaint d'enne r'leudge,
Elle é fri mon tiûere...lai pieudge....

BONSOI, LAI YENNE !

Lai yenne é son vésaida de Carimentran :
Paimé les yeutchîns, elle euvre sai lairdge goûerdge.
C'ment enne véye cognéchaince, muatte et soûedje,
Elle sanne récriaie, mains è n' pairvînt ran !

Ses grôs l'eûyes évad'nès raivoétant dâs grant
Lai-vâs, â fond d'lai neût, aitye que bâl'ment boudge :
L'airée di djoué, que veut effaicie, c'ment toûedje,
C'te djôrimelle de yenne, que tot churprend.

I crais voûere, aicretchie dains les vôtis di cie,
Lai raichurainne fidiure d'lai bèle aimie,
Que vînt, c'ment in fidèye foulta, me sailuaie,

Émeûdre mai musatte et me béyie lai grie
Des hâtous sains meûjure qu' peupyant l'univie
Des poûeres dgens qu'nôs sons, chu lai tiere aibeûquès !





ÉPLÛES DAINS LAI NEÛT.

Lai mée sanne entmije, mains n'ât djanmais muatte.
Sai michtérieûje étcheune mermeuje sains râte.
Lai djoénèe l'é véti de totes les tieulès :
Voidje, grijatte, bieûve et, poi-côps mirgodlèe,
C'ment les mâchots d'enne bâchatte.

Les roétchèts aint sôbi ses niaffes, ses aissâts ;
Ès tieurant lou répèt, mitnaint ès réchtant quiâts.
Lai dyètè di s'roiye vait bâl'ment s'effaicie...
Lai reinne de lai neût n'ât pouè encoué soûetchie
Di fond des aibêmes de sâ.

Dains lou noi sains meûjure an ôt dempie brond'naie
C'ment de trichtes foltas, des dj'nâtches désôlès...
Lai paivou pô è pô élairdge son povi,
Lai grie étnaîye l'aîme qu'é predju échpoi
De r'voûere l'monde et ses biâtès...

Mains tot d'in côp l'aiv'neûtche d' ci gronc'naint vîti
S'enfûele de çhailles yeutchîns et d'yos sôris.
Des lumieres voidjes, de biains rés bânitçhaints,
In merveilleou boquat des bèlles çhios des tchaimps
Éçhairaint lou monchtre endremi.

Éplûes miraîçhoulouses, de lai vétçhaince !
Krômas d'oûe que tchairmant nos eûyes pai vot' dainse !
Méssaidges des dgens ès dgens, échprits indgénious
Que v'lant dire yot' refus, yot'combat coéraidgeou
Et mâgrè tot nôs r'béyie fiance !

ÉCHPOI.

Lai caje de lai roûe-neût
Çhaite mon aîme et mon tiûere ;
Mes sondges sannant s'enfûere,
L'aipaîje ât c'ment in émeû.

Lai-vâs, djûaint dains les nues,
Grulant les dries rés violats.
Ç'ât lou messaidge douçat,
Lou bé sôri di Bon Dûe.

I ôs tos les siv'ments,
Les piânjêts des grijes âves,
Lou brond'naidje des bôs mâves,
L'aiv'neûtche et ses raivéch'ments.

Lai fiere sentou d'lai tiere
M'envayât c'ment in échpoi,
Ïn aipeul reûtchâle et noi
De voûes évadhènes et tchieres.

I prends ci môment grietou
C'ment in soingne de coéraidje,
Ïn miraiçhe simppe et saidge,
Eûffri pai not'Orinou.

Lou djoué s'en vait, brâment sôle...
Lai yenne et les çhais yeutchîns
Dainsant dains lou cie sains fin
Et virant âtoué d'not'bôle,

S'naidgeous d'lai vie éternâ,
De lai lumiere novèle,
Que revînt tôdje pus bèlle,
Â fond de lai neût de Nâ

SONDGE D'ÉTERNITÉ

C'ment ìn aindgelat dains son bré,
L'afaint é sôri è l'oûejé,
Çhaile çhiôtrou veni di cie
De tote sai foûeche ainoncie
Sai djoûe d'lai novèlle djoénèe.

D'innai mon sondge m'é tchaimpè
Vés ìn pairaidis de tieulèes,
Lai main dains lai main de mai mie,
Tiaind qu'son visaidge s'ât r'virie
Tchairmou élusèt de biâtè.

C'ment dains les tieutchis d'ìn tchété,
Nôs tchem'nans, ensoinnaint nos pés,
Sailuaint de muats tchainties,
Que peupyant de braives ôvries,
Coéraidgeous et pieins de dyétè.

I saivurôs, dremaint è d'mé,
C't'imaidge que r'djoffait d'aimoué,
D'échpoi, de craiyaince en lai vie,
Qu'les dous nôs poyans paircôri
Dains ìn sondge d'éternité.



LOU MAÎTRE DE SAIDGENCE



Djean de Lai Fontaine ât mon pouche de saidgence !
Tiaind qu'è fait en l'ordyou crâ boussaie sai romance,
Tiaind qu'è béye lai pairôle è l'aîne et â blin,
I crais me recognâtre, daivô mes véjins.
Lou poète aivisè nôs tchairme et nôs ïnchtrut,
Son s'né dains les fôles reuchele c'ment ïn ru.
Adj'd'heû i m'seus râtè devant dous péronnaïdges
Que n'aivînt poué meinme landyaidge.
Vôs porèz bïn les déssâvraie.
Po chûr i vôs léche d'visaie
S'è fât en ryaie ou en pûeraie.

È y aivait dains ïn coénot
Dous bordgeais que se tchaimâyînt.
Yun était rétche et peus bugnot,
L'âtre pouêre mains tot malin.
C'tu qu'aivait de quoi v'lait môtraie son aivaintaidge :
È sôt'nait que tot hanne saidge
Daivait y tirie son tchaipé.

(I me d'mainde poquoi è farait l'honoraie
Po des sôs qu'èl aivait hér'tès !)

« Mon aïmi, qu'è diait s'vent è son sciengou véjïn,
Vôs se prentes po ïn môssieu,
Mains vôs èz prou fâte de pain.
Chu vot'tâle, djanmais de tçhnieû !
Vôs êtes tôdj' dains vos yéjures,
Et vôs demoérèz dôs les toéts.
Vôs poétchèz lai meinme vétüre
Dâs lai Tôssaint djainqu'en djuyèt.
Â long d'vôs, djanmais de vâlat,
Niun po entret'ni vot' hôtâ.
Not 'paiyis n'é p'fâte de dgens
Dépnâyous, que n'dépeinsant ran.

I crais brâment utiye de tchaimpaie ses sôs :

Ç'ât c' qu'i âi lou piâji de faire bin des côps.
Dâli i enrétchâs l'ôvrie et lou vendou,
I peux sôt'ni les aimeûnous
Ïnchtruts, que m'aidrassant praiyiere
Po vos métchaints yivres marlières ! »
C'tu que se retendait dinnai
É cognu l'soûe qu'è méritait.
Lou sciencou l' oûeyait se bragaie,
Èl é léchie lou temps péssaie.
Lai dyierre ât v'ni dains lai contrèe,
Lou yûe ât aivu décombrè.
Nos dous bordgeais aint fu lai vèlle :
Lou saivaint é trovè enne tchaince novèlle,
Di temps que lou teûné n'avait piepe è maindgie :
Èl était r'boussè d'tot poitchot.

Djâse se te veus, cré dôbot,
Lou saivoi é tôdje son prie !

CANTIÇHE EN L'ORINOÛ

Voichi les feuyes qu'prignant yos tchâdes tieulèes,
Voichi lou drie temps qu'nôs ainnonce l'airrivèe
D'lai fête d' Sînt François, qu'ât aivu sîmpye et pouère
Et que nôs é léchie ïn vrâ exempye po vouère
Lai biâtè de lai tiere, orinèe pai l'Bon Dûe,
Qu'è tchainte de tote son âime et qu'è sailue.
En ci temps qu'lou monde nôs sanne mâpiaîjaint,
Lai naiture malaite et peus les dgens métchaints,
Rebotans bîn endrait nos échprits et nos eûyes,
Raivoétans envirovô dâs ïn pus djoyou beûye,
Aidmirans les marvoiyes daivô Sînt François,
Po rempiâtre nos tiûeres d'aimoué et d'échpoi.

« Segneû, è me fât te lônâie
Daivô tot c'que t'és orinè !
Chutôt po not'frère soroye,
Que sai lumiere ât sains poroil,
Et sai biâtè nôs dit sains fin
Tai foûeche et ton aimoué pussaint.

È m'fât t' lônâie, Segneû, po lai yenne not'sô
Et tos les yeutchîns qu't'és faiç'nès, bés pus que tot !

È m'fât te lônâie, Segneû, po l'oûere not'frère,
Po lou cie serin, lai pieudge que nôs ât chère.
Dinnai t' sôtîns tes orinures.

È m'fât t' lônâie, Segneû, po l'âve not'sôratte,
Qu'ât taint utiye, taint çhaire et peus taint douçatte.

È m'fât t' lônâie, Segneû, po not'frère lou fûe,
Que échhaire lai neût de sai çhâime et qu'éplûe :
Èl ât se djoyou pai naiture !

È m'fât te lônâie, Segneû, po lai tiere âchi :
C'ment enne mère elle nôs poétche et nôs neûrrit,
Elle béye è foûejon ses fruts, ses târes çhoés !

È m'fât t' lônaié, Segneû, po ces que poidgennant,
Po ces qu' seûffrant lai mâdjeûtije et les torments :
Qu'ès feuchînt binhèy'rous ces qu' l'aipaîje voingnant,
Pouèch'que dains lou pairaidis te les corann'rés.

È m'fât te lônaié, Segneû, po not'sô lai moûe.
De tos les dgens elle pâré in djoué lou coûe.
Mâlhèy'rous ces que vaint meuri dains lou petché,
Mains hèy'rous ces qu'airaint aiccompyi tai v'lantè,
Pouèch'qu'ès s'raint vétçhaints po tote l'éternité.

È vôs fât lônaié, b'nâtre et r'méchiaie lou Segneû,
Tot boénn'ment le sèrvi et peus lu faire honneû. »



LAI BELLE ENDREMOUSE

En sivaint chu tes eûyes çhôs,
Ïn sondge tçhisse et peus s'enfut ;
Di temps que montant de poitchot,
Djoyous et michtérieûs, des bruts,
En ci maitin di paitchi-feûs,
Paimé lou v'laidge que s'émeut.

Les dgens, lai voidjou sont en fête,
L'ouêjé pûere, les çhoés tchaintant ;
Mains tyée musitye empiât tai tête,
Que d'moére paisibye, d'feûs di temps,
Â loueu, dains lou paiyis des fôles,
Bin en-delai de lai pairôle ?



Se pyainne et djôlie endremouse,
Tiaind qu'te me dirés tos tes ch'crêts ?
Ces qu' te coitches, fiere et ordyouse,
C'ment in predju trésoûe , i crais.
Dedôs ton sevré d'aindgelatte
Dainsant des foûejons de musattes...

Ïn sôri rite chu ton v'saidge,
Muat c'ment ïn traïçaint yeutchïn ;
Èl eur'yût po chur enne imaidge,
Bonhèye loidge et séjaint,
Les promâsses de ton aiv'ni,
Cés qu'ton âme ne peut r'teni.

Dinche, i t 'raivoétôs, maîtchemiatte,
Sains râte et tot endjenâtchi,
Pouèch'que dains ïn tiûere d'baïchatte
Lai biâtè di monde ât nitchie :
Et po lai tieuri t' m'entrinnôs
Drie les lâdes d'tes eûyes çhôs !

BIÂTÈ AIMIE

Ci-en-d'lai des bouènes di cie,
Nôs n'poyans s'empâtchie d'sondgie,
De djâbyaie, de musaie sains râte
En toi, Biâtè, que nôs ains fâte.

Mains i n'veus pe t'craire predjue,
Tôdje évadnèe dérie les nues,
Meûcie dains la mée des yeutchîns,
Voué qu'i te détçh'vraî en lai fin.

Te n'és pe churprije en l'hésâid
Dains les éplûes d'in élusèt.
Niun ne sairait bîn te déf'ni,
Mains s'vent i t'aî â long senti.

Lou temps s'en vait et c'qu'ât vétçhu
Demoére tôdje dains l'seuv'ni.
Dains lai rébiaince è sanne tchu,
Sains nôs aivoi djanmais tçhitties.

Dinnai tes eûyes pieins d'lumiere,
Se bious, fonds et preutches en voirtè,
Sont encoué po moi lai frontiere
Qu'ne peut dépéssaie lai Biâtè.

Bés eûyes aimis, pôsès chu moi,
Raimoyaints, târes, douçats et çhaîs,
Vôs vîntes me s'mondre dains vot' redyaîd
Lou r'toué di chér grant-père François.


LAI MÂDGIE DES POÉMES

I vorôs tchaindgie lou monde daivô mes mains :
Aivoi senti lai main que grule et lai çhaiti,
Aivoi ôyi lai main que d'mainde et lai bâjje,
Saivoi tendre lai main, saivoi pâre tai main...

I vorôs émeûdre ci monde en l'raivoétaint,
Répondre â bondjoué de tchètche çhoé de bot'nie,
Compâre lou çhôt'ment des oûeres de l'huvie,
Aittendre lou miraiçhe di soroiye yevaint...

Ât-c' qu'i porâit poi-côps daivô de simpyes mouts
Faiç'naie lou pairaidis de mes sondges paiv'rous ?
Endjenâtchie les mées, ritaie dechu yos âves ?

Lai mâdgie des poémes nôs tchaimpe, grietous,
Vés lai rive rébiousse di paiyis tchairmou,
Que nôs sôrit è d'mé, s'effaice et peus se sâve...



POÉTES DI PATOIS...

Poètes di patois, que tchaintèz note tiere,
Et vòs, mes bons aimis, les riòlous, les contous,
Que saîtes nòs eûffri lou sné et lai saivou
Di laingaidge des lôvres et peus de lai praiyiere,

De lai bésaingne âchi, des laîgres, di sôrire,
De l'aimitie encoué, de lai poéne et d'lai ch'vou,
D'lai saidgence d'nos dgens, et des môments hèy'rous,
De lai fête en l'hôtâ et peus de l'heure driere,

È vòs tus, adjed'heû, i tire mon tchaipé,
Pouèch'que vòs èz conchtrut chu lou sô di pèssè
Ïn monûement fin dru, qu'éçhaire not' aiv'ni,

C'tu que vadge, è traivie lai fûete des onnaies,
L'tiulturâ païtrimoinne et lou djèt de musaie
Des véyes de ciro, en tiu i dis « méchi » !

